

मार्निंग डोगरी न्यूज़ बुलेटिन, समें. 09.20 Hrs

<><><><><><>

Headlines

1. प्रधानमंत्री नरेन्द्र मोदी होर अज्ज रोजगार बारै लोआए जा'रदे बजट शा बाद आहले वेबीनार च हिस्सा लैडन।
2. मुखमन्त्री ओमर अब्दुल्ला होरें आखेआ ऐ जे सरकार, जम्मू च धार्मिक सैलसफा आहले सर्किटें गी विकसित करोग तांजे सैलानिएं गी होरनें थाहें बक्खी बी आकर्षित कीता जाई सकै।
3. खेड्ड मन्त्री सतीश शर्मा होरें औंदी 9 थमां 12 मार्च तगर गुलमर्ग च होने आहली खेलो इंडिया विन्टर गेम्स लेई लेफ्टिनेंट गवर्नर मनोज सिन्हा होरेंगी साद्दा दिता ऐ।
4. रक्षा मन्त्री राजनाथ सिंह होरें आखेआ ऐ जे उन्नत थेआरें सने साईबर ते अंतरिक्ष राहें पैदा कीती जाने आहली रूकावटां, सुरक्षा लेई गंभीर चुनौतियां पैदा करदिआं न।
5. आईसीसी चैंपियंस ट्रॉफी दे कल खेड्डे गेदे पैहले सेमीफाइनल मुकाबले च भारत नै अस्ट्रेलिया गी हराइयै फाइनल च अपनी थाह पक्की करी लैती ऐ।

<><><><><><>

PM-Budget

प्रधानमंत्री नरेन्द्र मोदी होर अज्ज वीडियो कांफ्रेंसिंग राएं रोजगार बारै लोआए जा रदे बजट दे बाद आहले वेबीनार च हिस्सा लैंगन। वेबीनार दे प्रमुख विषयें च लोकें च निवेश, अर्थ बवस्था ते नवाचार शामिल न। रोजगार दे मौके पैदा करना सरकार दा इक प्रमुख तरजीह आहला खेतर रेआ ऐ। प्रधानमंत्री हुंदे नजरिए कोला प्रेरित होइयै सरकार नै नौकरिएं च बाददा करने ते रोजगार दे मते शा मते मौके पैदा करने लेई केई गैई पुट्टियां न। एह वेबीनार सरकार, उद्योग, शिक्षाविदे ते नागरिकें बश्कार सहयोग गी बढ़ावा देग ते सुधारवादी बजट घोषणाएं गी असरदार नतीजे च बदलने लेई चर्चाएं गी बढ़ावा देग। वेबीनार च सलाह सूत्र दा

लक्ष्य टिकाऊ ते समावेशी विकास लेई बत पदरी करना, प्रौद्योगिकी ते होरनें खेतर च नेतृत्व ते 2047 तगर विकसित भारत दे लक्ष्य गी हासल करने दी भेठा कम्म करने आहले इक निग्गर ते कुशल कार्यबल दा निर्माण शामिल ऐ।

<><><><><><>

CM-Tourism

मुख्यमंत्री उमर अब्दुल्ला होरें कल घोषणा कीती ऐ जे सरका जम्मू प्रांतें च सैलसफा गी बढ़ावा देने लेई श्री माता वैष्णो देवी जी दी जातरा पर औने आहले श्रद्धालुएं गी प्रांतें दिएं होरनें सैलानिएं थाहरें बक्खी आकर्षित करने लेई नमें सैलसफा सर्कट तैयार करोग। उनें आखेआ जे सरकार इन्दे चा 10 जां 15 प्रतिशत यात्रिएं गी बी जेकर होरनें थाहरें भेजने च कामायब होंदी ऐ तां बी एह इस खिते लेई मता फैयदेमंद साबत होग। उमर अब्दुल्ला जिंदे कश सैलसफा मैहकमे दी बी जिम्मेदारी ऐ। कल विधानसभा च प्रश्नकाल दौरान इक सोआलें दा परता देआरदे हे। उनें दस्सेआ जे 2023 च कुल 2 करोड़ 11 लक्ख 24 जहार 674 सैलानी जम्मू-कश्मीर आए जिसले जे 2024 च एह गिनतरी 2 करोड़ 35 लक्ख 24 जहार 629 रेही ते इन्दे च बिलतरतीव 2023 ते 24 च विदेशी सैलानिएं दी गिनतरी 55 जहार 337 ते 65 जहार 452 दर्ज कीती गई।

<><><><><><>

Khelo India

युवा मामलें ते खेड्ड मंत्री सतीश शर्मा होर कल उपराज्यपाल मनोज सिन्हा होरेंगी मिले ते उनेंगी 9 मार्च कोला 12 मार्च तगर गुलमर्ग च आयोजित होने आहली खेलो इंडिया स्यालू खेड्डें लेई साद्दा दिता। गल्लबात दौरान खेड्डें दे अलावा आम जनता दे हितें सरबन्धी मुद्दें, सरहदी इलाकें दे विकास ते नौजवानें ते करसानें दी भलाई बेहतरी आहले कई सारे विषयें पर चर्चा होई।

<><><><><><>

LG-Books

वरिष्ठ पत्रकार ते लखारी ओ.पी शर्मा होरें कल राजभवन जाइयै उपराज्यपाल मनोज सिन्हा होरें गी अपनी नमीं कताब डोएंस ऑफ डोगरी लिटरेचर भेंट कीती। एह कताब डोगरी साहित्य च

अपना नमुल्ला जोगदान देने आहलें ते साहित्य अकादमी आसेआ सम्मानित हस्तिएं दे बारे च ऐ जिनें डोगरी भाशा दे बाद्दे लेई बड़ी अहम भूमिका निभाई ऐ। मनोज सिन्हा होरें ओ.पी शर्मा होरें गी इस कताब लेई ममारकबाद दिती। पत्रकारिता ते लेखन दे खेतर च उन्दे जोगदान लेई सराहना कीती ते भविक्ख लेई उनेंगी शुभकामनां बी दितियां। उपराज्यपाल होरें कल 2 किताबें दा विमोचन कीता जिंदे च प्रो. अजय खजूरिया हुंदी लिखी दी जम्मू: अ लैंड ऑफ हैरीटेज एंड लीजेंड्स ते डॉ. अनिला सिंह चाढ़क हुंदा गजट संग्रह रिश्तों के भीगे अखबार शामिल न।

<><><><><><>

Jammu Surya Ghar

जम्मू दे जिला विकास कमिशनर सचिन कुमार वैश्य होरें कल जिला सतह दी इक बैठका च इत्थे पी.एम सेर्य घर मुफ्त बिजली योजना तैहत होए दे कम्में दी प्रगति दा जायजा लैता। डी.सी होरें अधिकारिणं गी निर्देश दिता जे ओह इस बारे जागरूकता अभियान शुरू करन ते योजना तैहत लाए जाने आहले रूफटॉफ सोलर पैनलें गितै मंजूरी देने दे कम्मैं च बी तेजी आहनन। उनें कम्मैं गी तौले ते बवस्था आहले ढंगे सिर तोढ़ चाढ़ने लेई जम्मू बिजली विकास निगम लिमिटेड कन्नै नेड़मा तालमेल बनाइयै कम्म करने दा बी निर्देश दिता।

<><><><><><>

MSME

खिते च भलेआं लौहके, लौहके ते दरम्याने दर्जे दे उद्यमें गी बढ़ावा देने दे मकसद कन्नै एम.एस.ए.ई. विकास ते सुविधा दफ्तर आसेआ स्मॉल स्केल इंडस्ट्रीज़ गंग्याल आसेआ एम.एस.एम.ई. दे केन्द्री मंत्रालय दी 'लीन' योजना बारै इक जागरूकता कार्यक्रम दा सरिस्ता कीता गेआ। इस मौके उप्पर उद्यमिता सरबन्धी जागरूकता कार्यक्रम, बौद्धिक संपत्तिएं दे अधिकारें सरबन्धी जागरूकता कार्यक्रम, पीएम विश्वकर्मा सेमीनार, पीएम विश्वकर्मा जागरूकता कार्यशाला, उद्यमिता ते कौशल विकास प्रोग्राम, प्रबंधन विकास प्रोग्राम ते होरनें बी केई चाल्ली दे आयोजन कीते गे। ध्यानजोग ऐ जे एमएसएमई सरबन्धी केन्द्री मंत्रालय आसेआ कुसै बी लीन कलस्टर लेई 12 लक्ख रुपें शा लेइयै 32 लक्ख रुपें तगर दी सब्सिडी उपलब्ध करोआई जंदी ऐ।

<><><><><><>

ते हुन बाकि दिएं खबरें कन्नै विजय बजाज।

DM-Unconditional Threats

रक्षा मंत्री राजनाथ सिंह होरें आखेआ ऐ जे भारत गी अपने आपै गी नमी किस्में दिएं लड़ाइयें लेई बी तैयार रखना होग कीजे दुश्मन हून पारम्परिक थेआरें कन्नै नेई नमें गैर पारम्परिक तरीकें राएं बी खतरा पैदा करी सकदे न। उनें आखेआ जे अज्जै दे दुश्मन पैहले आंगर पारम्परिक थेआर लेइयै नेई औंदे। साइबर हमले, गलत सूचना फैलाने आहले अभियान ते अंतरिक्ष दे रस्तेया जसूसी जनेए नमें खतरे अज्ज उभरिएं सामने आवा करदे न जिंदे नै निब्बड़ने लेई असेंगी नमें ढंग सरिस्ते अपनाने होंगन। नमी दिल्ली च अंदरूनी सुरक्षा गितै नमियां तकनीकां विषय पर आयोजित इक सेमीनार च बोलदे होई राजनाथ सिंह होरें आखेआ जे आतंकवाद, खब्बे धड़े दे अतवाद, कट्टरवाद ते उग्रवाद प्रभावित इलाकें च बक्ख-बक्ख चाल्ली दे मुद्दे ते चुनौतियां न।

<><><><><><>

Ex-Servicemen CS

मुख्य सचिव अटल डुल्लु होरें सिविल सैक्रेटेरिएट जम्मू आहले अपने दफ्तरें च फौज दी 16 कोर दे जीओसी नवीन सचदेवा हुंदे आसेआ पुट्टे गेदे साबका फौजिएं दे मुद्दें मसलें ते चैंताएं गी सुनेआ। इ'नें महत्वपूर्ण मंगें च साबका फौजिएं दे सब्भनें रिकार्डें गी डिजिटल रूप देने सने अपनी सेवा दे अखीरले ब'रे च बी उ'नेंगी साबका फौजिएं सरबन्धी कोटे तैहत नौकरी लेई आवेदन करने दी इजाजत दिते जाने ते साबका फौजिएं दिएं सेवाएं गी एनसीसी ट्रेनरें दे तौर उपपर इस्तेमाल कीते जाने दी मंग बी मुख्य तौर पर शामिल ही। मुख्य सचिव होरें गृह विभाग गी सलाह दिती जे ओह इ'नें सब्भनें मंगें उपपर गौर करन ते इ'नेंगी पूरा करने दी दिशा च गैहीं पुट्टन। मुख्य सचिव होरें आखेआ जे राश्ट्र, साबका फौजिएं दिएं सेवाएं लेई म्हेशां उ'दा कर्जदार ऐ।

<><><><><><>

Road-Poonch

पुंछ दे डिप्टी कमिशनर विकास कुंडल होरें सिड़क हादसैं गी घट्ट करने ते लोकें दी सुरक्षा जकीनी बनाने दे मकसद कन्नै कीते जा'रदे सिड़क सुरक्षा हीलें दा जायजा लैता ते सीमा सड़क संगठन यानि बी.आर.ओ. गी एह निर्देश बी दिता जे ओह भिम्बर गली सुरंग थमां लेइयै पुंछ कस्बे तोहड़ी दे रस्ते उपपर 8 शौचालय परिसरें दा निर्माण करन। एहदे अलावा डिप्टी कमिशनर होरें नाखां वाली सिड़कें पर गड़्डिएं दी रफ्तार दी हद्द आहले साईनबोर्ड लाने दे बी निर्देश दिते

ते ए-आरटीओ होरेंगी आखेआ जे ओह स्कूली बसें च सीसीटीवी कैमरे लाने दे कम्मै च तेजी आहनना जकीनी बनान। जिला स्तर दी सिडक सुरक्षा कमेटी नै लापरवाही कन्नै गड्डी चलाने आहलें खलाफ सख्त कार्रवाईयां करदे होई उंदे लसैंस रद्द कीते जाने दी जरूरतें पर बी जोर पाया ऐ।

<><><><><><>

Kishtwar-Disaster

किश्तवाड़ दे डिप्टी कमिशनर रजेश कुमार शवन होरें जिले च आपदा प्रबंधन दिएं तैयारिं दा कल जायजा लैता। इस सरबंथे च लाई गेदी बैठका दरान, हाल च होई दी बर्फबारी करी पानी ते बिजली सप्लाई सने, सिडक संपर्क गी पुज्जे दे नुकसान दा जायजा लैने ते इस सरबंथे च अगड़ी गैहीं पुट्टने पर ध्यान केन्द्रित कीता गेआ। डिप्टी कमिशनर होरें किश्तवाड़ कस्बे ते एहदे आले-दोआले दे इलाकें च पानी सप्लाई सरबंथी स्थिति दा जाजया लैता। एहदे अलावा उंनै प्रभावत होए दे लोकें गी जरूरी मदाद उपलब्ध करोआने दी प्रशासन दी वचनबद्धता गी बी पक्का कीता।

<><><><><><>

CEC to CEO

भारत दे मुख चुनां आयुक्त ज्ञानेश कुमार होरें सब्भनै मुख चुनां अधिकारिं, जिला चुनां अधिकारिं ते बूथ सतह दे अधिकारिं गी जोर दइयै आखेआ ऐ जे ओह नियमें दी ढंगै सिर पालमा करदे होई पूरी निष्ठा ते पारदर्शी ढंगै नै अपनिं जुम्मेवारिं गी निभान। नमीं दिल्ली च लग्गी दी सब्भनै राज्यें ते केंद्र शासित प्रदेशें दे मुख चुनां अधिकारिं दी 2 रोजा कांफ्रेंस गी संबोधित करदे होई उंनै अधिकारिं गी निर्देश दिता जे ओह सियासी पार्टिं लेई उपलब्ध बी होन ते उन्दे आसेआ पुच्छे जाने आहले सोआलें पर प्रतिक्रिया बी देन। मुख चुनां आयुक्त होरें आखेआ जे हर मुख चुनां अधिकारी गी मुद्दें ते विषयें साबबै कीती गेदी कारवाइं दी रिपोर्ट इस म्हीने दी 31 तरीक कोला पैहले-पैहले अपने सरबंधित उप चुनां आयुक्त कश जमा कराई देनी होग।

<><><><><><>

Cricket

आईसीसी चैंपियंस ट्रॉफी दे कल दुबई च खेड़े गेदे पैहले सेमीफाइनल मुकाबले च भारत नै अस्ट्रेलिया गी हराइयै फाइनल च अपनी थाह बनाई लैती ऐ। जंदी संझां 265 दे लक्ष्य दा पिच्छा करदे होई भारती टीम नै 11 गेंदां बाकी रौहदे बड़े अराम कन्नै 267 द्रौड़ां बनाइयै मैच अपने नांs करी लैता। सभ्भनै शा मती 84 द्रौड़ां बनाने आहले विराट कोहली होरेंगी प्लेयर ऑफ दा मैच घोषित कीता गेआ। तोआई अज्ज पाकिस्तान दे ल्हौर च खेड़े जाने आहले दुए सेमीफाइनल च न्यूजीलैंड दा मुकाबला दक्खन अफ्रीका कन्नै होग। इस मैच दी जेतू टीम दा मुकाबला औंदे ऐतवारें, फाइनल च भारत कन्नै होग।

<><><><><><>